



QUÆSTIO MEDICA.

*Cardinalitiis disputationibus manè discutienda
in Scholis Medicorum, die Jovis
secundâ Martii.*

M. FRANCISCO MAILLARD,
Doctore Medico, Præside.

An noxia Febricitantibus Ova?

I.

UT ægri non quolibet medicamento curantur; sic non quovis alimento nutriuntur. Quod uni prodest affectui, nocet alteri. Aliqui levibus, vehementibus alii, nonnulli mediocribus pharmarcis indigent. Hic calidam, ille frigidam expostulat escam. Alios juvat, alios lædit valentis materiæ cibus. Tot proprietatum radix eadem quæ morborum; varia nempè succorum indoles, qui semel vitiati similibus exasperantur, castigantur contrariis. Hinc Febricitantibus non

omnia conveniunt. Quæ motos componunt humores, quæ comprimunt alienum calorem, ea sunt illis salutaria; quæ fovēt insolentem sanguinis efferuescentiam, quæ cæteros augment incendii febrilis apparatus, ea noxia sunt & abdicanda.

II.

VEHEMENS & inordinatus sanguinis motus, febris est. Pereunt hoc motu caloris blanditiæ; perit mollities succorum; crescit in corde peregrinus ignis mali semina latè dispersurus. Hinc quot partes, tot intemperies; quot liquores, tot efferuescentiæ. Fervoris impetu quoquò versum dissilit quidquid tenuius, quidquid acrius est in humoribus. Id si cutim feriat, rigor indè concitatur; si thoracem, tussis; si cerebrum, capitis dolor. His accedunt ob incandescentiam sanguinis pulsus celer, spiritus difficilis; ob macerata calore viscera linguæ siccitas, multa sitis, pertinax vigilia.

III.

FEBRILIS hæc tempestas assidua est, aut interpolata: certis illa temporibus exacerbatur, vel eodem tenore furit; silet hæc aliquandiu modo tertiâ, modo quartâ luce recursura. Vitiosus sanguis utriusque reus est: is à chylo vitiatur sæpius, ut chylus à cibo: si videlicet alimentum fuerit ætiosum, si nimis

sulphureum, consimilis futurus est chylus: hic in fervore positus tumultuosè movet & incendit cruorem, cui ferè totus admiscetur. Proinde, Febricitantes offendit quidquid ebullientibus succis addit novum motûs incitamentum: id mali genus accersunt Ova quovis modo parata.

IV.

IGNEUS est illis calor ab origine. Præferenda sunt animantes undè producantur; ætiosissima materies ex quâ conflantur. In Ovi candido multùm salis est volatilis; in luteo multùm sulphuris, Ut tenues illæ particulæ molem farinæ cum quâ confunduntur Ova, subigunt, attollunt; itâ massam sanguinis cui permiscetur, agitant, distendunt. Indè sanguis vehementer incitatus, Febriles accendit aut alit igniculos. Demùm, si turgeant Ova succo nimium nutriente; succus hic officit Febricitantibus, quos leve juvat alimentum: si fervidis ingesta visceribus in bilem facessant; hæc quoque bilis fomes est peregrini caloris: si retorreamur & indurescant ab æstu ventriculi, velut ab igne focario; statim vitellus flammam concipit, & fit oleum mox exarsuræ Febris irritamentum.

IGITUR dum Febris adurit ægrotantes, iis pessima sunt Ova; cibum suggerunt nimis robustum, nimis æstuantem. Habes in Ovis undè conciteris ad libidinem; sed hæc libido quasi Febris est. Est in Ovis, & quod uberem provocat sudorem, & quod externos digerit tumores; sed hoc, qualecunque sit, insolenter etiã commovet sanguinem, renovatque flamas. Adeò multis Ova constant ex partibus mole minimis, motu valentissimis: si lenta, si crassior aliundè sit in Ovis materia, suos illa sales continet; suo fervet intùs sulphure.

Ergo noxia Febricitantibus Ova.

Præponebat Lutetiæ,
JOANNES-FRANCISCUS FOY-VAILLANT,
Belloyacensis, Baccalaureus Medicus. A. R. S. H. 1690.

Apud FRANCISCUM MUGUET, Regis & Facultatis Medicinæ
Typographum.